



STINAPA TA INFORMA

E WELA SPÒRTIF

Sigur bo a yega di wak e obranan ku e ta traha di kueru di kabritu, manera tas, faha i figura saká riba kueru. Nò? Straño! Pasobra asta turistanan di tur parti di mundu ta pasa su kas pa kumpra. E wela kariñoso di 78 aña aki ta masha okupá ku su trabounan boluntario pa kua asta el a haña un kondekorashon den 'de Orde van Oranje-Nassau'. Tambe e ta den klup di damas i klup pa 60+. E ta keda den bon kondishon dor di partisipá na diferente deporte manera dominó i bolas. E ta gusta wak deporte na televishon. E ta enkantá ku e tènista Serena Williams. El a gana vários aña tras di otro e premio pa mihó stènt i produkto riba Dia di Arte. Thelma de Palm-Scherptong tin 5 yu i 57 aña kasá. "Biba hende ku hende", ta e promé palabranan ku Thelma ta ekspresá ku firmesa ora e kontemplá kiko naturalesa di Boneiru ta nifiká p'e. E ta sigui splika ku ora bo ta biba den òf ku naturalesa, bo aktitut ta kambia kompletamente. Bo balor i normanan ta bira mas positivo. P'esei e ta asina orguyoso ku e naturalesa di Boneiru ta asina limpi i ku ta yuda pues ku e proseso aki. Tambe Thelma ta asina agradesido di por biba den e naturalesa boneriano dor ku aki no sa pasa desaster di naturalesa manera na otro pais. El a presensia e senario tristu di Sint Maarten despues di orkan i a realisá kon dichoso nos ta na Boneiru. Tambe el a biaha bai otro paisnan i islanan i a eksperenshá kuantu polushon tin na otro lugánan. "Aki nos airu ta asina limpi" Thelma ta bisa. Thelma ta stima nan kunuku, Lac i Seru Largu mashá. E ta haña un lástima ku e no sa landa, pero asina mes e ta gosa di Lac. I no papia mes di e piskánan fresku. Ántes Thelma tabata bai masha hopi mes riba Seru Largu. Especialmente anochi pa disfrutá di e paisahe di Boneiru i di Klein Bonaire. Manera un wela, un tiki estrikto pero yen di amor, e ta advertí nos pa kuida Boneiru. No kambi'é pa nada di mundu. Hisando su man na laira e ta konkluí: "Nos no por biba sin naturalesa. Kada biaha nos hala rosea; TA NATURALESA!"

Skirbí pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru